

ESTATUTOS DA FUNDACIÓN CIDADE DA CULTURA DE GALICIA

TÍTULO PRELIMINAR

Disposicións xerais

Artigo 1. *Denominación e natureza*

Ao abeiro do dereito recoñecido no artigo 34.1 da Constitución española, previa autorización do Consello da Xunta de Galicia, constitúese a Fundación Cidade Da Cultura De Galicia, como fundación de interese galego, pertencente ao sector público autonómico

A Fundación, constituída sen ánimo de lucro, e cuxo patrimonio está afectado de forma permanente á realización dos fins de interese xeral que constitúen o seu obxecto, ten a consideración de medio propio e instrumental da Xunta de Galicia.

Artigo 2. *Domicilio e ámbito de actuación*

O domicilio da fundación radicará no territorio da Comunidade Autónoma de Galicia, no lugar de Monte Gaiás da cidade de Santiago de Compostela, provincia de A Coruña.

O padroado poderá promover o cambio de domicilio, mediante a oportuna modificación estatutaria, con posterior comunicación ao protectorado e inscrición no Rexistro de fundacións.

A fundación desenvolverá as súas actividades principalmente no territorio da Comunidade Autónoma de Galicia.

Para o mellor cumprimento dos seus fins, a fundación poderá crear delegacións en territorio distinto ao do seu ámbito de actuación, así como establecer relacións instrumentais con terceiros en calquera ámbito territorial.

Artigo 3. *Personalidade e capacidade*

A Fundación ten personalidade xurídica desde a inscrición da escritura pública de constitución no Rexistro de Fundacións de Interese Galego, que lle atribúe plena capacidade xurídica e de obrar, podendo realizar en consecuencia todos aqueles actos que sexan necesarios para o cumprimento dos fins fundacionais, con suxeición ó establecido no ordenamento xurídico.

A fundación non poderá exercer potestades públicas, podendo realizar unicamente actividades relacionadas co ámbito competencial da entidade fundadora, contribuíndo á consecución dos seus fins sen que isto supoña á asunción da titularidade das súas competencias, agás atribución legal expresa.

Artigo 4. *Duración*

A fundación constitúese por tempo indefinido. Porén, se nalgún momento os fins propios da fundación se estimasen cumpridos, ou fose imposible a súa realización, o padroado poderá acordar a extinción, de conformidade co disposto na lexislación vixente e nestes estatutos.

Artigo 5. *Réxime normativo*

A Fundación rexerese pola vontade do fundador expresada nestes estatutos, polas disposicións que en interpretación e desenvolvemento dos mesmos estableza o padroado, pola Lei 12/2006, do 1 de decembro, de fundacións de interese galego, polo Decreto 14/2009, do 21 de xaneiro, polo que se aproba o Regulamento de fundacións de interese galego, polo Decreto 15/2009, de 21 de xaneiro polo que se aproba o Rexistro de fundacións de interese galego, polas demais normas que as desenvolvan ou substitúan, así como polo resto da normativa estatal e autonómica que resulte de aplicación ás fundacións en cada momento.

Pola súa condición de fundación do sector público de Galicia, tamén lle será aplicable a Lei 16/2010, do 17 de decembro, de organización e funcionamento da Administración xeral e do sector público autonómico de Galicia, o Decreto 217/2008, de 25 de setembro, polo que se regula o contido mínimo das propostas de creación de novas entidades do sector público autonómico, a normativa reguladora do réxime financeiro e orzamentario de Galicia, a Lei de contratos do sector público, nos aspectos que procedan, e calquera outra disposición normativa que lle resulte de aplicación en cada momento.

TÍTULO PRIMEIRO **Obxecto da fundación**

Artigo 6. *Fins*

A fundación ten por obxecto creación, explotación e promoción de áreas ou centros de conservación, produción, exhibición y consumo cultural, comunicativo e tecnolóxico que constitúa un espazo multifuncional, multidisciplinar e aglutinador propicio a interacción cultural.

O desenvolvemento do obxecto fundacional poderá realizarse directamente pola fundación, ou mediante colaboración con outras entidades, organismos, institucións ou persoas que contribúan á consecución dos fins fundacionais

Artigo 7. *Actividades fundacionais*

Para a consecución dos fins mencionados no artigo anterior, a fundación pode realiza-las seguintes actividades:

a) As necesarias para converterse nun actor clave na difusión cultural, que sirva de punto de encontro entre os cidadáns e a cultura.

- b) As que contribúan a desempeñar un papel destacado no proceso de enriquecemento/aprendizaxe cultural da cidadanía, con especial énfase na adopción e uso das novas tecnoloxías.
- c) As tendentes a propiciar o achegamento da Cidade da Cultura de Galicia dun xeito físico á cidadanía, servindo como espazo de desenvolvemento de actividades non estritamente culturais, con especial énfase no lecer, o contacto coa natureza e o deporte.
- d) Cantas dinamicen o sistema cultural galego, promovendo a difusión e conservación da nosa cultura, e a formación dunha comunidade artística vibrante, atendendo tanto a autores de referencia como a novos talentos ou a cultura de base.
- e) As que fomenten a interrelación e os proxectos en conxunto entre axentes de distintos ámbitos das industrias culturais e creativas, con especial énfase na cooperación interrexional e a colaboración pública e privada.
- f) As axeitadas para posicionar o Gaiás como referente internacional de reflexión, debate e formación no ámbito da innovación na xestión cultural, que contribúa á profesionalización dos diferentes axentes e das súas iniciativas.
- g) As que impulsen o Emprendemento empresarial no ámbito das industrias culturais e creativas, con especial énfase en proxectos que favorezan a innovación, tanto tecnolóxica como non tecnolóxica, e a súa transferencia aos sectores máis maduros do tecido produtivo, servindo como plataforma de desenvolvemento e promoción da marca país Galicia.
- h) As actividades e accións que contribúan a converter á Cidade da Cultura de Galicia nun proxecto economicamente sostible e socialmente rendible, incorporando novos socios estratéxicos, tanto públicos como privados, e diversificando as fontes de financiamento para acadar a sustentabilidade do proxecto con independencia do ciclo económico.

Artigo 8. Liberdade de actuación

O padroado terá plena liberdade para determinar as actividades da fundación, tendentes á consecución daqueles obxectivos concretos que, a xuízo daquel e dentro do cumprimento dos seus fins, sexan os máis adecuados ou convenientes en cada momento.

TÍTULO SEGUNDO

Regras básicas para a aplicación dos recursos ó cumprimento dos fins fundacionais e para a determinación dos beneficiarios

Artigo 9. Destino das rendas e ingresos

A fundación destinará o patrimonio e as súas rendas ao cumprimento dos fins fundacionais.

Á realización dos fins fundacionais deberá ser destinado, polo menos, o oitenta por cento dos resultados das explotacións económicas que se desenvolvan e dos ingresos que se obteñan por calquera outro concepto, deducidos os gastos realizados para a súa obtención, debéndose

destinar o resto a incrementa-la dotación fundacional ou a reservas segundo acordo adoptado polo padroado. Non se incluírán no cálculo dos ingresos as doazóns recibidas en concepto de dotación.

O prazo para o cumprimento desta obriga, será o comprendido entre o inicio do exercicio no que se obtiveran e os catro anos seguintes ao peche do dito exercicio

Os gastos de administración non poderán supera-la porcentaxe fixada na lexislación vixente.

Artigo 10. *Publicidade das actividades*

O padroado dará información suficiente dos fins e actividades da fundación, a través de páxina web, nos termos sinalados no *artigo 27 do Decreto 14/2009, de 21 de xaneiro polo que se aproba o Regulamento de Fundacións de Interese Galego*, para que sexan coñecidos polos eventuais beneficiarios e demais interesados.

Artigo 11. *Beneficiarios/as*

A finalidade da Fundación serve ao interese xeral e, en consecuencia, poderán ser beneficiarios/as da mesma todas as persoas naturais ou xurídicas de toda índole.

TÍTULO TERCEIRO

Órganos da fundación: órganos de goberno e órganos de xestión

I – ÓRGANOS DE: PADROADO E GOBERNO

Artigo 12. *O Padroado*

O padroado é o órgano de goberno, representación e administración da fundación, e executará as funcións que lle corresponden con suxeición ao disposto no ordenamento xurídico e nos presentes estatutos.

Correspóndelle ao padroado o cumprimento dos fins fundacionais, a administración dos bens e dereitos que integran o patrimonio da fundación, mantendo o seu rendemento e utilidade. Os membros do padroado deberán desempeñar as súas funcións coa dilixencia dun representante leal.

Os membros do padroado responderán solidariamente fronte á fundación dos danos e prexuízos que ocasionen polos actos contrarios á lei ou aos estatutos, ou polos realizados sen a dilixencia coa que deben desempeñar o seu cargo.

Artigo 13. Carácter gratuito do cargo de patrón

Os patróns exercerán o seu cargo sen que, poidan percibir retribución polo desempeño da súa función.

Os patróns terán dereito a ser reembolsados dos gastos debidamente xustificadas que o desempeño da súa función lles ocasione.

Artigo 14. Composición

1. O Padroado da Fundación poderá estar composto polos seguintes cargos:

Presidente/a de Honra: Presidente/a da Xunta de Galicia

Presidente/a do Padroado: Conselleiro/a de Cultura, Educación e Ordenación Universitaria, ou titular da consellería con competencia en materia de cultura.

Vicepresidente/a: Conselleiro/a de Facenda, ou titular da consellería con competencia en materia de Facenda.

Secretario/a: Secretario/a Xeral Técnico da Consellería de Cultura, Educación e Ordenación Universitaria, ou da consellería con competencia en materia de cultura.

O/A Secretario/a poderá estar asistido dun funcionario, con voz e sen voto, se así o estima conveniente.

Vogais:

Secretario/a Xeral de Cultura, ou titular da secretaría/dirección xeral con competencia en materia de cultura.

Conselleiro/a de Medio Ambiente, Territorio e Infraestruturas, ou titular da consellería con competencia nesa materia.

Alcalde/sa do concello de Santiago de Compostela.

Director/a xeral do Patrimonio Cultural, ou titular da secretaría/dirección xeral con competencia nesa materia.

Director/a xeral de Comunicación, ou titular da secretaría/dirección xeral con competencia nesa materia.

Director/a da Axencia Turismo de Galicia, ou titular da entidade con competencia nesa materia.

Director/a da Axencia Galega das Industrias Culturais (AGADIC), ou titular da entidade con competencia nesa materia.

Secretario/a Xeral Técnico e do Patrimonio da Consellería de Facenda, ou da consellería con competencia en materia de Facenda.

Director/a Xeral de Política Financeira e Tesouro, ou titular da secretaría/dirección xeral con competencia nesa materia.

Abanca Corporacion Bancaria SA, ou entidade que ostente a personalidade xurídica da mesma, a cal nomeará un representante.

Fundación Galicia Obra Social (Afundación), ou entidade que ostente a personalidade xurídica da mesma, , a cal nomeará un representante.

Telefónica de España ou entidade que ostente a personalidade xurídica da mesma, , a cal nomeará un representante.

O cargo de patrón conservará a súa vixencia aínda no caso de que varíen a súa denominación ou razón social, sempre que as sucedan outras entidades que asuman as competencias daquelas.

2. Os Patróns fundadores, desempeñarán o seu cargo con carácter permanente, en tanto a súa designación no fose revogada, ou cesado no cargo que lle atribúa condición de membro do Padroado, sendo substituído polo titular do cargo de referencia. Cada patrón fundador terá voz e voto nas sesións do Padroado.

3. O número de patróns poderá ampliarse con patróns adheridos sempre que sexan aceptados polo Padroado, nas condicións que este último estime convenientes.

Poderán ser membros do padroado as persoas físicas que teñan plena capacidade de obrar e non estean inhabilitadas para o exercicio de cargos públicos. Os patróns que sexan persoas físicas, deberán exercer o seu cargo persoalmente, non obstante poderá actuar no seu nome e representación outro patrón por el designado.

As persoas xurídicas poderán formar parte do padroado e deberán designar a persoa física que as represente, o cal deberá exercer o seu cargo persoalmente. No caso de que dito representante non asista a sesión convocada do Padroado, o voto do patrón só poderá ser delgado noutro patrón por el designado.

Artigo 15. Regras para a designación e substitución dos seus membros

Os patróns designados pola Xunta de Galicia desempeñarán o seu cargo con carácter permanente, en tanto a súa designación non sexa revogada, ou cesado no cargo que lle atribúe a condición de membro do padroado, sendo substituído polo titular do cargo de referencia.

Os membros do padroado, para o exercicio das súas actividades, deberán aceptar o seus cargos na forma prevista na normativa vixente. As designacións coas correspondentes aceptacións serán comunicadas ao protectorado e inscritas no Rexistro de Fundacións.

Artigo 16. Formas de aceptación

Os patróns entrarán a exercer as súas funcións despois de aceptar expresamente o seu cargo. Esta aceptación poderá constar no outorgamento da carta fundacional, en documento público independente, en documento privado con sinatura lexitimada por un fedatario público, mediante comparecencia realizada ante o Rexistro de Fundacións de Interese Galego, ou perante o padroado, acreditándose mediante certificación expedida polo/a secretario/a co visto e prace do presidente/a.

Artigo 17. Organización do padroado

O padroado contará necesariamente cun/ha presidente/a e un/ha secretario/a. Para os supostos de vacancia, ausencia ou enfermidade designará de entre os seus membros un/ha vicepresidente/a.

Artigo 18. O/a presidente/a

Ao/á presidente/a correspóndelle exercer a representación da fundación ante toda clase de persoas, autoridades e entidades públicas ou privadas; convocar as reunións do padroado, presidilas, dirixir os seus debates e resolver os empates que se produzan nas votacións co seu voto de calidade.

Tamén lle corresponde a execución dos acordos adoptados, podendo para isto realizar toda clase de actos e asinar aqueles documentos necesarios para tal fin.

Artigo 19. A/o vicepresidente/a

Corresponderá ó/á vicepresidente/a realizar as funcións do/a presidente/a nos casos de vacante, ausencia ou enfermidade, podendo actuar tamén en representación da fundación, naqueles supostos en que así se determine por acordo do padroado.

Artigo 20. O/a secretario/a

Son funcións do/a secretario/a custodiar a documentación pertencente á fundación, redactar as actas correspondentes ás reunións do padroado, e a súa transcripción ao correspondente libro de actas, expedir as certificacións e informes que sexan necesarios, e todas aquelas que expresamente lle sexan atribuídas.

Nos supostos de vacante, ausencia ou enfermidade, o/a secretario/a será substituído polo Secretario/a Xeral Técnico e do Patrimonio da Consellería de Facenda, ou da consellería con competencia en materia de Facenda.

Artigo 21. *Facultades do padroado*

Na súa actuación, o Padroado deberase axustar ó preceptuado na lexislación vixente, na vontade dos fundadores manifestada nestes estatutos.

Corresponde ó Padroado cumprir os fins fundacionais e administrar con dilixencia os bens e dereitos que integran o patrimonio da fundación mantendo plenamente o seu rendemento e utilidade.

Con independencia das funcións que lle atribúen os presentes estatutos e sen prexuízo de solicitar, se é o caso, as preceptivas autorizacións ó protectorado, a título meramente enunciativo, serán facultades do padroado:

- a) Exerce-lo goberno, a representación, inspección, vixilancia e orientación da fundación.
- b) Interpretar e desenvolve-los presentes estatutos e, se é o caso, adoptar acordos sobre a súa modificación sempre que resulte conveniente para os intereses da fundación e a mellor consecución dos seus fins.
- c) Fixa-las liñas xerais de funcionamento da entidade e de distribución e aplicación dos fondos dispoñibles entre as actividades da fundación.
- d) Acordar a apertura e peche dos seus centros, oficinas e delegacións
- e) Nomear apoderados xerais ou especiais, outorgar poderes así como a revogación dos mesmos.
- f) Aprobar o plan de actuación e as contas anuais que serán obxecto de presentación ó protectorado.
- g) Facultade de aprobar e/ou modificar o cadro de persoal
- h) Delega-las súas facultades en un ou máis patróns, sen que poidan ser obxecto de delegación:
 - A aprobación das contas anuais e do plan de actuación.
 - A modificación dos estatutos
 - O acordo de fusión, extinción ou liquidación da fundación
 - Calquera acto que precise a autorización ou aprobación do protectorado.

Artigo 22. *Dereitos e obrigas dos membros do padroado*

Son dereitos dos membros do padroado:

- a) Recibir a convocatoria coa orde do día e asistir ás xuntanzas dos órganos dos que formen parte
- b) Exercer o dereito de voto
- c) Obter a información precisa para o cumprimento das súas funcións

Son deberes dos membros do padroado:

- a) Cumprir e facer cumprir os fins fundacionais
- b) Administrar os bens e dereitos que integran o patrimonio da fundación mantendo o seu rendemento, utilidade e produtividade segundo os criterios económico-financeiros dun bo xestor.
- c) Asistir as xuntanzas do padroado e velar pola legalidade dos acordos que nelas se adopten
- d) Realizar os actos necesarios para a inscrición da fundación no Rexistro de Fundacións de Interese Galego.

Artigo 23. Responsabilidades dos patróns

Os patróns deberán desempeñar o seu cargo coa dilixencia dun representante leal

Os patróns responderán solidariamente fronte á fundación dos danos e perdas que causen por actos contrarios á lei ou ós estatutos ou polos realizados sen a dilixencia coa que deben desempeñar o cargo. Quedarán exentos de responsabilidade os que votasen en contra do acordo e os que proben que, non intervindo na súa adopción e execución, descoñecía a súa existencia ou, coñecéndoa, fixeron todo o conveniente para evitar o dano ou, polo menos se opuxeron expresamente a aquel.

Artigo 24. Cesamento e suspensión dos membros do padroado

O cesamento e suspensión dos membros do padroado producirase nos supostos previstos no artigo 24 da Lei 12/2006, de 1 de decembro, de fundacións de interese galego ou normativa que no seu momento regule as causas de cesamento e suspensión dos patróns, polas seguintes causas: por morte ou declaración de falecemento, así como por extinción da persoa xurídica; renuncia comunicada coas debidas formalidades; por incapacidade, inhabilitación ou incompatibilidade de acordo co establecido na Lei; por cese no cargo por razón do cal foron nomeados membros do Padroado e por calquera outra causa establecida na Lei.

A renuncia ao cargo de patrón poderá facerse por calquera dos medios e cos trámites previstos para a aceptación, e será efectiva desde o momento en que se lle notifique ó órgano de goberno da fundación.

O cesamento e suspensión dos membros do padroado comunicarase ao protectorado e inscribírase no Rexistro de Fundacións.

Artigo 25. Reunións do padroado

O padroado reunirse, polo menos, dúas veces ó ano e tantas veces como sexa preciso para a boa marcha da fundación. Corresponde ó/a presidente/a convocar as reunións, por propia iniciativa ou a petición das 2/3 partes dos membros do padroado

A convocatoria expresará a orde do día, así como o lugar, data e hora da reunión, cursarse por escrito e farase chegar a cada un dos membros, polo menos, con cinco días de anticipación á data da súa celebración, por calquera medio que permita deixar constancia da súa recepción.

Non será precisa convocatoria previa cando, estando presentes tódolos patróns, acorden por unanimidade a celebración da reunión e a correspondente orde do día.

Artigo 26. Formas de deliberar e adoptar acordos

O padroado entenderase validamente constituído cando concorran, presentes ou representados, polo menos a metade máis un dos seus membros.

Os acordos serán inmediatamente executivos e adoptaranse por maioría simple dos asistentes, sendo dirimente en caso de empate o voto do/a presidente/a. Non obstante requirirase voto favorable da maioría absoluta dos membros do padroado para aprobar acordos que se refiran á reforma ou modificación dos estatutos, á disposición de bens a título gratuito, á fusión e á extinción da fundación.

Das reunións do padroado levantarase acta polo/a secretario/a, que deberá ser subscrita por tódolos membros presentes e aprobada na mesma ou seguinte reunión. Unha vez aprobada transcribírase no correspondente libro de actas e será asinada polo/a secretario/a co visto e prace do/a presidente/a.

Artigo 27.- A Comisión de auditoría e control.

A comisión de auditoría e control estará integrada por un mínimo de tres membros designados polo padroado. No resto de cuestións relativas á organización e funcións da Comisión de auditoría e control estarase ao disposto na normativa que, no seu caso, aprobe a Xunta de Galicia, en desenvolvemento da Lei 16/2010 de 17 de decembro de organización e funcionamento da Administración xeral e do sector público autonómico de Galicia. A comisión terá seguintes funcións:

- a) Valoración del informe de auditoría interna, proponiendo as conclusións que estimen oportunas ao padroado, sen prexuízo das funcións que corresponda ao protectorado.
- b) Velar pola independencia e eficacia da función de auditoría interna.
- c) Coñecer o proceso de información financeira e os sistemas de control e xestión de riscos internos asociados ás contingencias relevantes para a entidade.
- d) Elaborar un informe anual sobre as súas actividades.
- e) Calquera outra que se dispoña na normativa que, no seu caso, aprobe a Xunta de Galicia, en desenvolvemento da Lei 16/2010 de 17 de decembro de organización e funcionamento da Administración xeral e do sector público autonómico de Galicia.

II – ORGANOS DE ASESORAMENTO E XESTIÓN

Artigo 28. *Consellos asesores*

O padroado poderá crear consellos asesores e comisións de estudo, así como órganos similares con funcións de apoio e asesoramento, para o mellor desenvolvemento dos fins fundacionais. A creación destes órganos deberá ser notificado ao protectorado e inscrito no Rexistro de Fundacións.

Os membros dos consellos asesores e/ou comisións, serán nomeados polo padroado de entre persoas e ou entidades que destaquen pola súa experiencia, coñecementos, ou colaboracións nas materias que constitúen o obxecto da fundación.

O cese como membros dos consellos asesores ou comisións producirase por decisión do padroado ou por renuncia.

O cargo de membro destes órganos é gratuíto e indelegable.

Artigo 29. *O/a Director/a Xerente*

O padroado poderá acordar a contratación dun director/a xerente con competencias en materia de xestión e administración da fundación.

O/a director/a xerente é o responsable das funcións ordinarias de administración e xestión da fundación, exercendo as facultades delegadas polo padroado e previstas nestes estatutos.

Artigo 30. *Nomeamento e cese*

O/a director/a xerente será nomeado polo Padroado a proposta do/a presidente/a. Dito cargo poderá ser retribuído no marco da relación laboral correspondente.

O cese producirase:

- Por morte ou declaración de falecemento
- Por incapacidade, inhabilitación ou incompatibilidade, de acordo co establecido na lei
- Por renuncia comunicada coas debidas formalidades
- Por resolución xudicial firme
- Por acordo motivado do padroado a proposta do presidente/a.

Artigo 31. *Funcións*

Son funcións do/a director/a xerente:

- a) executar e facer cumprir os acordos do padroado e da Comisión de auditoría e control.
- b) O seguimento do plan estratéxico da fundación e a avaliación dos seus resultados, dando conta ao padroado.
- c) A xestión económica da fundación, nos termos e condicións atribuídas polos órganos de goberno
- d) A xestión do persoal e a dirección administrativa da fundación
- e) Todas aquelas funcións que lle sexan atribuídas de forma expresa polos órganos de goberno da fundación.

TÍTULO CUARTO Réxime económico

Artigo 32. *Patrimonio fundacional*

O patrimonio da fundación está integrado por toda clase de bens, dereitos e obrigas susceptibles de valoración económica que integren a dotación, así como por aqueles que adquira a fundación con posterioridade á súa constitución, aféctense ou non á dotación.

Uns e outros deberán figurar a nome da fundación, constar no seu inventario e no Rexistro de Fundacións de interese galego.

O padroado promoverá, baixo a súa responsabilidade, a inscrición a nome da fundación dos bens e dereitos que integran o seu patrimonio nos rexistros públicos correspondentes.

Artigo 33. *Adscrición do patrimonio fundacional*

Os bens e dereitos que conforman o patrimonio, así como as rendas que produzan, quedarán vinculados ó cumprimento dos fins que a fundación persegue, nos termos establecidos na lexislación vixente e nos estatutos.

Artigo 34. *Financiamento*

A fundación, para o desenvolvemento das súas actividades, financiarase cos recursos que proveñan do rendemento do seu patrimonio e, se for o caso, con aqueles outros procedentes das axudas, subvencións ou doazóns que reciba de persoas ou entidades, tanto públicas como privadas.

A fundación poderá percibir cantidades derivadas de actividades e servizos directamente prestados por ela ós seus beneficiarios sempre que:

- a) Non desvirtúe o interese xeral para a Comunidade Autónoma.
- b) Non sexan contrarios a vontade fundacional
- c) Non implique unha limitación inxustificada do ámbito dos seus posibles beneficiarios

O exercicio económico coincidirá co ano natural.

Na xestión económico-financeira, a fundación rexerá de acordo cos principios e criterios xerais determinados na normativa vixente.

Artigo 35. *Plan de actuación*

O Padroado elaborará e remitirá ao Protectorado nos últimos tres meses de cada exercicio, un Plan de actuación no que se conteñan os obxectivos e as actividades que se teña previsto desenvolver no exercicio seguinte, xunto coa previsión de ingresos e gastos e memoria explicativa do mesmo.

O plan de actuación deberá presentarse ao Protectorado acompañado da certificación de aprobación por parte do Padroado, que se depositará no Rexistro de Fundacións de Interese galego.

Artigo 36. *Contas anuais*

En materia de orzamentos, contabilidade e auditoría de contas, a fundación rexerá polo disposto no Decreto legislativo 1/1999, do 7 de outubro, polo que se aproba o texto refundido da Lei de réxime financeiro e orzamentario de Galicia, sen prexuízo do cumprimento das obrigas establecidas na *Lei 12/2006, de 1 de decembro de fundacións de interese galego*, ou normativa que a substitúa ou resulte de aplicación futura en materia de orzamentos, contabilidade e auditoría de contas.

A fundación, levará unha contabilidade ordenada e adecuada á súa actividade, que permita o seguimento cronolóxico das actuacións realizadas, para iso, contará cun Libro Diario, Libro de Inventarios e Contas Anuais.

As contas anuais deberán ser aprobadas polo padroado no prazo de seis meses desde o peche do exercicio económico, e presentaranse ante o Protectorado no prazo de vinte días hábiles seguintes á súa aprobación para o seu exame e posterior depósito no Rexistro de Fundacións de Interese Galego.

As contas anuais, que comprenden balance, conta de resultados e memoria, forman unha unidade, deben ser redactadas con claridade e mostrar a imaxe fiel do patrimonio, da situación financeira e dos resultados da fundación. Presentaranse asinadas pola presidencia, ou pola persoa á que segundo os estatutos lle corresponda formularlas.

A memoria completará, ampliará e comentará a información contida no balance e na conta de resultados, e incorporará un inventario dos elementos patrimoniais da fundación. Ademais, incluírase na memoria as actividades fundacionais, os cambios no órgano de goberno, dirección e representación, así como o grado de cumprimento do plan de actuación, indicando os recursos

empregados, a súa procedencia, o número de beneficiarios en cada unha das distintas actuacións realizadas, os convenios que no seu caso se subscribiran con outras entidades para estes fins, así como o grado de cumprimento do destino de rendas e ingresos.

Así mesmo, a fundación remitirá á Intervención Xeral da Xunta de Galicia as contas anuais.

Artigo 37. Exercicio económico

O exercicio económico da fundación iniciase o 1 de xaneiro e remata o 31 de decembro.

TÍTULO QUINTO

Da modificación, transformación, fusión, escisión ou extinción

Artigo 38. Modificación de estatutos

Por acordo do padroado, poderán ser modificados os presentes estatutos, sempre que resulte conveniente aos intereses da fundación e se cumpran os requisitos previstos nestes estatutos e na lexislación vixente. A autorización da modificación estatutaria por acordo do Consello da Xunta, requirirá acordo do padroado coas maiorías que procedan segundo os estatutos e normativa aplicable.

Procederase a dita modificación cando as circunstancias que presidiron a constitución da fundación tiveran variado de tal maneira que esta non poda actuar satisfactoriamente con de conformidade cos estatutos en vigor.

Igualmente poderá procederse á transformación da fundación mediante modificación da súa condición de fundación do sector público autonómico, que será autorizada por acordo do Consello da Xunta de Galicia, en base a circunstancias que xustifiquen a súa transformación.

Artigo 39. Fusión e/ou escisión

A fundación poderase fusionar con outra ou outras, logo do acordo dos respectivos padroados. Igualmente o padroado poderá aprobar a escisión de parte da fundación, nos termos e cos requisitos legalmente establecidos

Artigo 40. Extinción da fundación

A fundación extinguirase por acordo do padroado e polas demais causas e de acordo cos procedementos establecidos pola lexislación vixente.

Artigo 41. Liquidación e adxudicación

A extinción da fundación determinará a apertura do procedemento de liquidación que será realizada polo padroado baixo o control do protectorado.

Os bens e dereitos resultantes da liquidación destinaranse ás fundacións ou ás entidades non lucrativas privadas ou públicas que persigan fins de interese xeral e que teñan afectados os seus bens, incluso para o suposto de disolución, á consecución daqueles, e que estean consideradas como entidades beneficiarias do mecenado, ou a entidades públicas de natureza non fundacional que persigan fins de interese xeral.

Corresponde ao Padroado designar as entidades receptoras destes bens, de acordo co establecido na lexislación vixente.

Artigo 42. Adopción dos acordos e comunicación e inscrición no Rexistro

Para a adopción de acordos de modificación, transformación, fusión, escisión, extinción e liquidación, será necesario o voto favorable da maioría dos membros do padroado.

Os ditos acordos, serán autorizados por acordo do Consello da Xunta de Galicia. Unha vez aprobados estes actos serán formalizados en escritura pública e inscritos no Rexistro de Fundacións de Interese Galego.

CLÁUSULA ADICIONAL

En todo caso, o previsto nos presentes estatutos non implica limitación ou substitución nas competencias que ó protectorado atribúe a lexislación vixente, e moi especialmente en relación coas autorizacións ou limitacións a que a fundación expresamente se somete.